



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Palestine tiri Hamas dang
hostages tem chioktsü ahang

Season tembangba sülen
Vardy-i Leicester toktsütsü



VOL. XXII ISSUE NO. 190 (ADOK 190)

DIMAPUR

ROGONÜ FRIDAY

RONGCHII (APRIL) 25, 2025

₹ 5.00

Mokokchung main incomer line shibangtsü

Dimapur, Rongchii/April 24 (TYO): Meyi mapang menügdakba nung power shibangba nungi kumzüka alitsü mechi arem chidoktsü asoshi 33kv Aolichen to Mokokchung main incomer ya April 26, 2025 anepdang 9:00 ako nungi nikongdang 4:00 ako tsüngta

mashi mapang shibangtsü, ta Er. Achanger T Aier, Sub-Divisional Officer, Mokokchung Electrical Sub-Division ajanga sangdong ka nung metetdaksü.

Anungji nüburtemi Department den amalitep akatsü mepishir, ta sangdong ajangasa ashi.

Tanü NBSE ajanga HSLC & HSSLC result sangdongtsü

Dimapur, Rongchii/April 24 (TYO): Nagaland Board of School Education (NBSE) ajanga High School Leaving Certificate (HSLC/Class 10) aser Higher Secondary School Leaving Certificate (HSSLC/Class 12) Examination 2025 indang result asüng April 25, 2025 nikongdang sangdongtsü.

Kaketshir temi pei indang marksheets ya NBSE official website nbsenl.edu.in nungi

reprangtetsü aser download sütetsü.

Iba tatidang nung takok mangur kaketshir temi compartmental test agütsütsü aser iba atema osang tejangja khen lir sangdongtsü.

NBSE ajanga agiba HSLC examination 2025 ya February 12-24, 2025 anogotem agia liasü aser HSSLC tatidang ya February 11 nungi March 7, 2025 tashi agia liasü.

Manipur nung paid childcare & maternity leave agütsütsü

Imphal, Rongchii/April 24 (Agencies): Governor-in-Council of Manipur senden tanabuba April 24, 2025 nü amendang sorkar mapa inyakba tetsürtem dak tali rangloker paid leave benefits atema Central Government's Office Memorandum amshitsü agizükogo.

Iba senden ya Angh Ajay Kumar Bhalla mendenpuba sür Raj Bhavan conference hall nung amen, kong Chief Secretary, aser department balala nungi Principal Secretaries, Commissioners aser Administrative Secretaries tem dena liasü, ta Raj Bhavan, Imphal nungi sangdong ka ajanga ashi. Tongtipang telemtetba ka

agibaji arishi küm 18 kübok alir tanur aliba tetsür sorkar mapa inyaker aser kija tebur mapa inyaker atema Child Care Leave (CCL) provisions mapa kuma inyaksü indang liasü.

Iba policy nungya pei tanur anepalutsü asoshi temsüa aliba employees temi anogo 730 (küm ana) tashi leave agitettsü. Ibai tang amshia aliba maternity leave entitlements nung tali bendenloksüba lir.

Ano council ajangasa tia makai nu menden nung lia tanur asüba mesüra sor mapang tatsüka tsüngta kinü tanur asüba asoshia tetsür atema anogo 60 special maternity leave agütsütsü renem.

State sorkari Aadhaar enrolment inyakyim tasen benoker



Commissioner, Nagaland, K.S. Anden Konyak-i April 23, 2025 nü Conference Hall, Commissioner's Office, Kohima nung Director, Economics & Statistics, Neidilhou Angami nem fingerprint scanners 24 aser smartphones 24 amoktsüdang tangokba noksa nung angur.

Dimapur, Rongchii/April 24 (TYO): Northeast ajunga nung tanur arishi küm 0 nungi 5 tsüngda alirtem Aadhaar nung züngoksemba jenjang ajungkettsü nükjidong nung Commissioner, Nagaland, K.S. Anden Konyak-i April 23 nü Department of Economics and Statistics nem fingerprint scanner 24 aser smartphone 24 agütsüogo.

Item osettem yagi state ajunga nung Aadhaar nung züngoksemba inyakyim tali tajungba atsülang inyaktettsü.

Item osettem agütsüba sentong ya Kohima nung Commissioner indang Office Conference Hall nung agi, kong ketdangsurtem aser stakeholder temi shilem agia liasü.

Sentong nung o jembiba

Political clearance application atema MEA-i portal tasen sayaogo

Dimapur, Rongchii/April 24 (TYO): India nung Government/autonomous institutions/private bodies ajanga ayongzüka mungdang, seminars, workshops aser saisapong sentong nung adentsü aruba bendanger nem political clearances agütsüba

maparen tajungba nung inyaktsü atema Ministry of External Affairs (MEA) ajanga online portal tasen - <https://conference.epolclearance.gov.in> - sayaogo.

Iba user-friendly platform ya inyakyim mapang ajemtsü aser

Digital India Mission yara iba service ajunga online kumdaktsütsü nükjidong nung lir.

MEA ajanga departments aser institutions ajunga dang iba portal amshitsü aser tarutsü nung tajungba akumtsü asoshi metokmeperi lemsateptsü ayongzükogo.

NFHRCC ajanga Nagaland Foothills Road otsü tarensen lemsatep

Dimapur, Rongchii/April 24 (TYO): Nagaland Foothills Road Coordination Committee (NFRCC) ajanga April 24, 2025 nü sangdong ka nung Nagaland Foothills Road puti otsü tarensen lemsatepa liasü.

Committee ajanga ashiba agi, iba lenmang yanglutsü ya 1974-75 mapang cabinet minister inyaka alisang asür Mhondamo Kithan (40 Bhandari A/C) ajanga Chief Minister asür Vizol Angami aser Dy. CM SC Jamir lenisüba kübok aser pa mapang tatsüka CM inyakdang mezüng merangdang, saka iba mapa meinyakteti yutsü.

Iba sülen 1993 küm Dr. SC Jamir ya Chief Minister aliba mapang aser Neiphiu Rio ya Minister In-charge for NPWD, Road & Bridge alidang Government of Nagaland ajanga merangdang, saka kidanger state nungi kanga sashia anema nokdakba mechi yutsü.

Maneni asen state telungzük nung lenmang tejangja aser tajung ka nüngdakba mechi Tizit nungi Dimapur tsüngta foothills lenmang sendakteptsü Concept

shidakba ya 2013 küm jangrutet aser iba mapang maparen ya Ao Senden-i anir CNTC teyari nung CSO temi Nagaland Foothills Road Coordination Committee (NFHRCC) kübok tenzük aser mapang tatsüka lir 10 Naga Tribal Apex HOHOs dangi ao.

Chief Minister Neiphiu Rio, Government of Nagaland lenisüba kübok PWD (R&B) aser NFHRCC ajanga kanga kumdanga aser anepalua NFHR project alignment inyak aser iba ya Naga Historic Survival Road ta agizük.

Asen state telungzük nung lenmang tesendaktep tajung peria maliba ajanga mezüngmeshiba aser kuli makai merenshiba nungi Naga nunger anitettsü mechi Naga nunger kin ter sangeri lungiemer iba project ya tenzüka ajanga iba foothills lenmang dang 'extra-ordinary project' ta ajar, ta sangdong ajanga ashi.

Nagaland arütsülen foothills nung aliba nüburtiem lenmang tesendaktep tajung maliba ajanga rongsenketzüng aser takum libaliru dangar memenepi aliba jenjang tajungba kumdaktsütsü

mangdang nung iba maparen ya tenzük.

Ali kibur temi compensation senjang kata memeshi ali agütsü, non state actors temi taxes khenyongi memeshitsü mulungtep, nüburtiem aginüba ama ataloktsütsü mechi sorkari alakteta inyak. Anungji iba Foothills Road dang extraordinary project ta-a ajar, ta NFHRCC ajanga ashi.

Foothills Road project ya danga project tem dang nungi khenyongi alakteta asünung, külemi alignments atema survey agitsü asoshi Nagaland sorkari Department of Public Works, R&B aser NFHRCC nem tashi agütsü aser contractor shimtsü tashi ajak agütsü aser sorkari nüngdakba sen mebushitet tashi 'credit' nung lenmang yanglua atatsü temelaba agütsü.

Iba yongji June 13, 2013 nung Ao, Lotha, Sema, Konyak, Phom, Rengma, Chang, Yimkhiong, Sangtam aser Khiamniungan kin tem senden ka mena liasü.

Iba mapang FHR ya Foothill Road nüngja nung yanglutsü aser

ali kibur dang FHR atema compensation memeshitsü mepishitsü lemteta liasü.

Nüchiso bushirtem dang iba lenmang nung tax memeshitsü ayongzüksü aser kecha yimya nunga Nagaland Foothills Road project ya politicize masütsü pangjem.

Iba sülen July 17, 2023 nung NFHRCC züngsem temi Nagaland CM Neiphiu Rio ajuru aser pai committee züngsem tem dang par sorkari iba project ya 'priority' nung inyaktsü aser senotsü atema shisabulu masütsü, kechi aser senotsü atema sorkari anepalutsü ashi.

July 23, 2013 nung arütsülen aliba MLA tem den senden ka Saramati Hotel nung mena iba Foothill Road project ya kecha yimya nunga politicize masütsü jembia liasü.

Ajisür August 14, 2013 nung iba lenmang asoshi Tsüngrem temoatsü jazüka lumia sarasadema amung aser September 24, 2013 nung NFHRCC ajanga kanga saka aser timtema mezüngbuba survey agia liasü, ta ashi.

Yamaji sür December 21, 2013 nung iba otsütsütsü lenmang yangluba maparen mezüng Longtho sector nung tenzük aser iba sülen December 27, 2013 nü Changpang II (ONGC), Baghty Division nung tenzük.

Iba project ya khenyongi balaka asünung, Ao Baptist Arogo Mungdang (ABAM)-i arogo züngsemtem ajanga sen 36,56,282 bendena NFHRCC nem agütsü, saka committee ajanga iba lenmang yanglur masü asünung iba tenla sen cheque ya Chief Minister nem June 26, 2019 nü pa indang Office Chamber nung Executive Secretary, ABAM ajanga NFHRCC züngsemtem lia amokja liasü.

Maneni Committee-i Nagaland Angh RN Ravi ajanga Ato Kilonser Narendra Modi dang Trans Nagaland Expressway (foothills road) ya National Highway jenjangi ajungketjang ta mepishia shiti ka October 19, 2019 nung zülua liasü.

(Maneni tapak 2 nung...)

Mkg nung Food Safety Training & Certification (FoSTaC) ayongzüka agi



Dimapur, Rongchii/April 25 (TYO): Food Safety Mokochung Zone-i ayongzüka April 24 nü Food Business Operators (FBOs) atema CMO Conference Hall Mokochung nung Food Safety Training & Certification (FoSTaC) sentong ayongzüka agiogo.

Food Safety Officer Sukumlo Yanthan, shiba lenisüba nung iba sentong agia liasü lai, iba sentong ya bakery, restaurant, cafe, hotel aser kidang chiyongtsü balala yangluba nung sendaka aliba

FBO tem dak rangloker agia liasü, ta ashi.

Dr. Sentizungla Marina Yaden Chief Medical Officer Mokochung aser I Tali Longkumer Councillor MMC natia Food Business Operators (FBOs) tem dang district nung consumer tem nem jenjang aketba service tajungba agütsütsü atema training ajanga shisatsü balala angazütsü ajungshia liasü

FSSAI FoSTaC-Master Trainer Mr. Anup Kumar Tewari-i, FBO tem nem of Food Safety and Standards

Licensing and Registration Regulations, 2011 kübok Schedule 4 nung aliba ama good hygiene aser manufacturing practice tem indang tangazükba agütsü.

Food Technicians Moangbenla Jamir aser Food safety on Wheels Mokochung Zone nungi Hamche Phom nati sentong nung shilem agirtem atema common food adulterants indang live demonstration ka sayuba den iba indang tangazükba agütsü. Maneni FBO tem nem IEC material tem agüja liasü.

DDMA Chumoukedima quarterly senden ayonger

Dimapur, Rongchii/April 24 (TYO): District Disaster Management Authority (DDMA), Chumoukedima-i, quarterly aser tzüngluruwa atema renemshia atatsü asoshi senden ka ayongzüko.

Iba senden ya May 2 nü 11 ako nungi tenzüka Conference Hall, Deputy Commissioner Office, Chumoukedima nung agütsü.

Iba dak sendakba nung DDMA züngsem ajak aser

tejaokertem quarterly DDMA nung shilem agütsü mepeshia metetdaksüogo.

Senden nung Chief Medical Officer, Dimapur; EE. PWD (R&B), Chumoukedima; EE. PWD (NHI, Kohima; SE Investigation Cell, WRD, Chumoukedima; EE. Water Resources Department, Chumoukedima; LEPHED, Chumoukedima; Urban Development Officer,

Chumoukedima; District Agriculture Officer, Chumoukedima; CVO, V & AH, Chumoukedima, DCSO, F & CS. Chumoukedima; District Commanders, HG, CD & SDRF, Dimapur; GM, NHIDCL, Chumoukedima nung dang tzüngluruwa atema renemshia aliba dak sendakba nung parnok department indang action plan renema bener arütsü metetdaksüogo.

AIDA-Don Bosco nati Job Fair aser Career Expo ayonger

Dimapur, Rongchii/April 24 (TYO): Lanurtem aser differently-abled people tem nem mapa inyaksü atema maongka agütsütsü asoshi AIDA (ANMA Integrated Development Association) aser Don Bosco Job Placement Network India na longjemer Kohima nung Honibarnü; April 26 nü Job Fair aser Career Expo ka ayongzüko.

Iba sentong ya Don Bosco

College, CL 665 (S), Ziekezou, Kohima-Meluri Road, Kohima, Nagaland - 797003 nung anepdang 9 ako nungi nikongtsütsü 3 ako tashi agütsü.

SC/ST aser Differently Abled (Dimapur) atema National Career Service Centre ajanga Ministry of Labour & Employment, Government of India-i nongita yariba iba sentong ya mapa bushirtem aser employer tem

sendaktepsütsü asoshi lir.

Tejangraratemi "Jobs DBI" mobile application ajanga züngoksemtsü nüngdaker, koba Google Play Store nung angütsü. Osang tejangjaba agütsü atema item number: 9863219567, 7005011582, 6009730949 den tongteprateptetsü, mesüra e m a i l : dimapur@donboscojobs.org ajanga osang tejangja agütsü akok.



Longkong nung lushi nung shirong chanu tepong ana aser tetsü ka ta tetsü mali senzua lia, Lanusanen (33) pa alui aodang lenmang nung ajurua apu aser Longkong Arogo nung Associate Pastor (Youth) Wb. Tsuknungmeren ajanga tongteprateper, Wildlife department nungi teküzmüker arua Dimapur zoo nung ayutsü bener ogo. Iba noksaji ka yangi angur . (Longkong, April 24, 2025).



DIMAPUR MISSION HIGHER SECONDARY SCHOOL

CHURCHES COLONY KHERMAHAL, DIMAPUR

ADMISSION NOTICE

Admission forms and prospectus for Class XI (Arts) for the session 2025-2026 are available in the school office between **8:30am - 2:00 pm.**

SUBJECT OFFERED

- 1 ENGLISH
- 2 ALTERNATIVE ENGLISH
- 3 HISTORY
- 4 POLITICAL SCIENCE
- 5 SOCIOLOGY
- 6 ECONOMICS
- 7 ENVIRONMENTAL EDUCATION

*Admission will be done on FIRST COME FIRST SERVED BASIS.

*Admission will commence from 25th April 2025.

Sd/-
Principal.

NFHRCC ajanga Nagaland Foothills... (TAPAK 1 NUNGI...)

Ajisür iba lenmang scaled survey tejangja agütsü atema MoRTH ajanga nungloktsüba ama CE Testing Company Pvt. Ltd, Kolkata nem inyakdaksütsü asoshi Apex Tribal Hoho tem ajanga bendenba NOC tem CM Rio nem agütsü.

Iba mapang Nagaland CM inyaka alisang (Rio) ajanga 2013 SPA kübok centrally assisted fund sen crore 70 shi anepalutsü, aser pa menden yutsür MP Lok Sabha ama New Delhi-i ao aser iba sülen NDA sorkari Planning commission shibang aser NITI AYOG amenok. Linük nung SPA funding system ya anen, anungji Foothills roads densema SPA kübok senotsü teyari agütsüba ajunga anenadok, saka NFHRCC ajanga maneni iba lenmang yanglutsü asoshi meranga nokdak, saka kuli kar ajanga 2014-2018 mapang Governor's Camp nung aliba Doyang Bridge yangluba anena liasü.

2013-18 mapang state nung CM balala melentep, ajisüaka NFHRCC-i Foothills road ken o mesendok.

2018 küm Neiphiu Rio tanaben CM ama state-i meyipa shilangba sülen FHR ya Trans Nagaland Expressway ta melenshitsüba nung pai tongti shilem agi, koba ajanga Peren District nung Khelma den sendaktepsü.

2018-19 mapang NFHRCC kibong nung Tribal Hohos 12 kuma Kuki INPI, Nagaland aser NZPO aden.

2021 küm nüburi kanga ajungshiba yong NFHRCC-i state sorkar dang iba project takum lidakja 2021-22 nung mongpu mapangbo 'jeep able road' kumdaksütsü mechi sen crore 30 inokdaksü.

Iba sülen Union Home Minister Amit Shah-i Niathu Resort nungi January 6, 2023 nü River Doyang, Governors' camp Liphanyan, Baghty Division nung (Nagaland nung talangtiba) apu 442.25 ft ya online ajanga semzüka liasü.

Iba sülen NFHRCC ajanga Nagaland Ang La Ganesan aser Union Minister of DoNER G. Kishan Reddy ajuru aser Nagaland sorkari meranga inyaka iba project ya SASIC Scheme küboki aitdakja 2023-24 fiscal year nung 1st phase atema soft loan sen 148.5 crore agütsü.

Iba sülen ajungbena Legislature kar teyari nung

Contractor Firms indang mangatettep tenzü, koba state sorkar, department aser Committee tsüngta 2013 agreements/understandings nung aibelenba lir, ta NFHRCC sangdong ajanga ashi.

Nagaland Apex Tribal Hohos 12-i nungloktsüba NFHRCC ya dak sendakba nung Legislature ishika kechi tebilemba nung lir? 2nd/3rd phase budget sen crore 800-1000 junga arütsü aliba nung parnoki NFHRCC ya tetsükdaksü ka ama ajiteter asü?

State sorkari April 30, 2025 nü stakeholders tem shisadokden senden ka ayongzüka ya talisa Foothills roads densema SPA kübok senotsü teyari agütsüba ajunga anenadok, saka NFHRCC ajanga maneni iba lenmang yanglutsü asoshi meranga nokdak, saka kuli kar ajanga 2014-2018 mapang Governor's Camp nung aliba Doyang Bridge yangluba anena liasü.

2013-18 mapang state nung CM balala melentep, ajisüaka NFHRCC-i Foothills road ken o mesendok.

2018 küm Neiphiu Rio tanaben CM ama state-i meyipa shilangba sülen FHR ya Trans Nagaland Expressway ta melenshitsüba nung pai tongti shilem agi, koba ajanga Peren District nung Khelma den sendaktepsü.

2018-19 mapang NFHRCC kibong nung Tribal Hohos 12 kuma Kuki INPI, Nagaland aser NZPO aden.

2021 küm nüburi kanga ajungshiba yong NFHRCC-i state sorkar dang iba project takum lidakja 2021-22 nung mongpu mapangbo 'jeep able road' kumdaksütsü mechi sen crore 30 inokdaksü.

Iba sülen Union Home Minister Amit Shah-i Niathu Resort nungi January 6, 2023 nü River Doyang, Governors' camp Liphanyan, Baghty Division nung (Nagaland nung talangtiba) apu 442.25 ft ya online ajanga semzüka liasü.

Iba sülen NFHRCC ajanga Nagaland Ang La Ganesan aser Union Minister of DoNER G. Kishan Reddy ajuru aser Nagaland sorkari meranga inyaka iba project ya SASIC Scheme küboki aitdakja 2023-24 fiscal year nung 1st phase atema soft loan sen 148.5 crore agütsü.

Pahalgam amakbayaPakistan nungerasalentong lir:Congress



April 24, 2025 nü New Delhi nung Congress Tir Mallikarjun Kharge den party lenirtem- Sonia Gandhi, Rahul Gandhi, KC Venugopal aser tangartem Congress Working Committee (CWC) senden nung adenba noksa nung angur.

New Delhi, Rongchii/April 24 (Agencies): Brihostibarnü Congress Working Committee (CWC)-i kiralongrartemi Jammu & Kashmir kübok Pahalgam amakba sashia aitsüogo.

April 22 kü kiralongrartemi amakdang raliwalir 26 tepset aser aika yiruja liasü.

Iba tatalokba nung takoksa angur kibongtem den mangyim jashi lemsatepa CWC-i bangzüng ka ajanga, "Congress Working Committee-i mangyimer kibongtem den mangyim jashi lemsateper. Iba ama tejashi mapang ka nung party-i temelung ajak agi parnok nungiter," ta

metetdaksü.

"Iba tatalokba ya tasüma it mapa aser kiralongra lir, aser iba ya Pakistan-i asalentong yangluba lir," ta CWC-i metetdaksü.

CWC-isa sepai jenti nem nükdaksüba Union Territory ka nung kiralongraba atema intelligence aser security tashimait bushisüngdanga asadangtsüla, kechiyong Pahalgam ya Union home ministry kübok lir, ta metetdaksü.

Brihostibarnü New Delhi nung Congress Working Committee (CWC) rongdak senden ka amen. Iba senden nungji Party Tir, Mallikarjun

Kharge, party lenirtem- Sonia Gandhi, Rahul Gandhi, Priyanka Gandhi Vadra aser tangartem aden. Kasa senden nungjisa lenirtemi asürtem nem akhüm agüja liasü.

CWC senden nung adentsü atema Rahul Gandhi-a US nungi ilonga meyipa aru.

Kiralongrartemi Pahalgam amakba sülen Rahul Gandhi aser Kharge napronglai Union home minister Amit Shah aser J&K Chief Minister Omar Abdullah na densema tongti ketdangsertem den osang metetpela liasü.

Congress-isa sorkar dang kiralongra anema telemetba agia inyaksü ayongzü.

Kiralongrar ajak nem temerenshi agütsütsü: PM Modi

New Delhi, April 24 (Agencies): Jammu & Kashmir kübok Pahalgam nung kiralongrartemi raliwalir 26 tepsetba sülen tang mezüng lokti nung jembidang Ato kilonser Narendra Modi-i, kiralongrartem maitsüji jangjatsü, bushitsü aser kiralongrar ajak den parnok pusemertem nem temerenshi agütsütsü, ta metetdaksü.

Nisung aika nem iba osang angatetdaksütsü atema Modi-i English agia jembia liasü.

"Kiralongra ajanga India tanela kodanga meraksadaksütetsü. Kiralongraji temerenshi magütsüi malitsü," ta paisa metetdaksü.

Brihostibarnü Bihar nung lokti den jembidang Ato kilonser Modi-i English oshi agi, "Medemertem, tanü ni Bihar li

nungi alima ajak dang ya sangdonger- India-i kiralongrartem aser parnok pusemertem ajak jangjatsü, bushitsü aser temerenshi agütsütsü. Alima tatembang tashi onoki parnok bushitsü. Kiralongra ajanga India tanela kodanga meraksatsütet," ta metetdaksü.

"Ochi temeden atema ajak inyaksü. Ibaji linük nüburtem ajak telemetba lir. Iba ama mapang nung onok den tejashi lemsatepba linüktem aser lenirtem ajak dang ni pelaba lemsateper," ta paisa metetdaksü.

"Pei jabasotem, adianutem aser kinüngbutem aika taküm samaogo. Asürtemji India tesem balala nungi- Bengal, Karnataka, Maharashtra, Gujarat, Odisha aser Bihar nungi lir. Kargil nungi

Kanniyakumari tashi asenok mangyim aser tejashiji kasa dang," ta pai ashi.

Pakistan tenüng metetshii Modi-i, kiralongrartem aser kiralongratsü atema asalentong yanglurtemji parnoki mamangtetsüsa temerenshi angutsü, ta ashi.

"Atangji temerenshi agütsütsü," ta pai ashi.

Takoksa angurtem aser parnok kibongtem den mangyim jashi lemsatepa Modi-i, April 22 nü kiralongrartemi Kashmir nung tai maket nisung 26 tepsetba atema linük tesem ajaken nüburtemi mangyimer, ta metetdaksü.

Sentong tetenzüklen Modi den sabang nung külemi aliba lenirtem aser sentong nung adenertemi ola madoki mokremer asürtem nem akhüm agüja liasü.

Pakistan nung aliba India nungertem dang meyipa arutsü tuyur

New Delhi, April 24 (Agencies): Brihostibarnü India sorkari India nungertem dang Pakistan-i maotsü tuyuba den külemi Pakistan nung aliba India nungertem danga tekeraba nung meyipa arutsü tuyuogo.

Kiralongrartemi Jammu & Kashmir kübok Pahalgam nung bendanger ka densema raliwalir 26 tepsetba sülen linük ana tsüngda tensa mejungi akümba mapang ka nung India sorkari sensotem dang linüki meyipa arutsü tuyur.

Cabinet Committee on Security senden amenba sülen Ministry of External Affairs (MEA)-i sangdong ka ajanga, "India nungertem dang Pakistan-i maotsü tuyur. Tang Pakistan nung aliba India nungertem danga tekeraba nung India-i meyipa arutsü tuyur," ta metetdaksü.

India sorkarisa Pakistan nunger atema visa services

anentsüba sangdongogo. Pakistan nunger nem agüja aliba Indian visas ajak April 27, 2025 nungi thinentsütsü.

Ano tamalen Pakistan nunger nem agüja aliba medical visas-a April 29, 2025 tashi dang asütsü. Tang India nung aliba Pakistan nungertem danga item visa 'expire' masüdangsa India toktsür oadokang ta tetuyuba agütsüogo.

Ano külen India-i Indus Waters Treaty tezüngzüktep-a anentsüogo. Pakistan-i parnoki kiralongra pusemba anentsü ta menangzü.

Iba dak alia Attari-Wagah arrtsü nung aliba integrated checkpoint-a shibangogo. Ajisüaka temelaba tejanga anguba sülen India telungi aita alirtembo May 1 tashi nung kasa lenmang ajanga meyipa aotsü atema temelaba agütsütsü.



Bengaluru, April 24, 2025: Kiralongrartemi Pahalgam nung raliwalirtem aika khasetba sülen Brihostibarnü tasü mang ka Bengaluru airport tonga bener arudang Karnataka BJP MP, Tejasvi Surya-i mangyimer kibong ajuruba noksa nung angur.

Murshidabad rara dak sendakba nung ano nisung 5 puogo

Kolkata, April 24 (Agencies): Tawa Waqf Act anema longkak aйдang West Bengal kübok Murshidabad nung rara adokba dak sendakba nung West Bengal Police-i ano nisung pongu puogo; ibaji densemabo tang tashi nung nisung 307 puogo.

Bodhbarnü nisung ponguji Murshidabad district kübok tesem balala nungi apu, ta Brihostibarnü police-i metetdaksü.

"Nisung pongu yagi rara adokdaksüba nung shilem agia lir. Onoki parnok Bodhbarnü apu," ta iba tatalokba bushisüngdangtsü atema tentetba Special Investigative Team (SIT) nung züngsem kati metetdaksü.

April 11-12 anogotem nung Murshidabad district kübok Shamsheganj, Suti, Dhulian aser Jangipur tesemtem nung rara tulu adoka liasü aser nisung asem asü.

Chhattisgarh-Telangana arrtsülen Maoists telungpur asem khaset

Raipur, April 24 (Agencies): Brihostibarnü Chhattisgarh-Telangana arrtsülen security sepaitemi Maoists telungpur asem khasetogo, ta police-i metetdaksü.

Chhattisgarh state kübok Bijapur district nung Telangana den arrtsülen arem nung sepaitem aser Maoists na tsüngda khatap, ta police ketdangser kati metetdaksü.

Maoists telungpur samatsütsü nükjidong nung Bastar region nung District Reserve Guard (DRG), Bastar Fighters, Special Task Force (STF), aser state police units,

Central Reserve Police Force (CRPF) aser Commando Battalions for Resolute Action (CoBRA) sepai 10,000 dak temai Maoists telungpurtem mita aoer; Telangana police-ia yariteper.

Telungpurtem aliba osang lazükba sülen Hombarnü sepaitemi operation tenzüka liasü. Iba tesem nungji Maoists battalion no. 1 nungi züngsemtem aser Telangana state committee of Maoists nungi züngsemtem aika lir; sepaitemi mapang talangka telungpurtem anema operation aotsü, ta police-isa metetdaksü.



New Delhi, April 24, 2025: Jammu & Kashmir kübok Pahalgam nung kiralongrartemi nisung 26 khasetba tatalokba anema New Delhi nung Pakistan High Commission office shibangtsür aliba noksa nung angur.



TIR YIMYIM YIMOBILEM (EDITORIAL)

DIMAPUR FRIDAY, APRIL (RONGCHII) 25, 2025

Lendong aketba tamangba yimsü

Yakanü Jammu & Kashmir nung Pahalgam ta ajaba topur tajung tesem ka nung Muslim nunger kiralongrartemi yangji monga aliba raliwalirtem rongnung Muslim nunger masüba rogotem shimteta khasetyonga aoba mapaji tebang agi ashitsü makokba kanga tejashitsü aser tesasatsü lendong mapa ka atalokogo. Alima nung kin o kin na rarar aser yamaji tanga Russia aser Ukraine na aser Israel o Hamas telok na tsüngda teraradak lir, ajisüaka item raraji tamangba yimsü kati tamangba yimsü ka anema raraba tongpang rara ka masü, parnokji alushi aser yimten tashi raktepa rarateper. Item rara denji tang Pahalgam nung atalokba lendongji medemdangra, iba yabo tamangba yimsü ka amangertemi tanga tamangba yimsü amanger anema tetsübutü kiralongra mapa inyakba ka lir. Atangji, yimten tsütsü India aser Pakistan na meputep, anungji teti temulung melemtepi alir, anungji tanga Pahalgam nung atalokba lendongji Pakistan yimteni meteta inyakba amato temulung melemi küma India-ibo aitsüogo. Ashiko, tsükchir lima amato züngshiba lima asünungji, Pakistan-ia akok tashi teti India nem timtem lendong agütsüdaktsünüa kiralongrar teloktem ajanga inyaka alitsüa akok. Aji oda, yakanü atalokba lendongji Pakistan nunger kiralongrar telok ka tenüng agi Lashkare-Taiba den tesendaktep aliba telok ka tenüng agi The Resistant Front teloki inyakba kiralongra mapa ka lir. Atangji, tang tashi Jammu & Kashmir yimten tebilemtsü ya India o Pakistan na tsüngda tatem küma telatetba ka dangi maruteti, Kashmir nunger kar Pakistan nung aser karbo India nung ta asenok India o Myanmar na tsüngda lemdanga ayutsüba amato lemdanger lir. Iba tebilemtsü yagi mapang mapang shia India aser Pakistan arrtsülen alirtem timtem takoksa ajurur. Atangji, Jammu & Kashmir yimten tebilemtsü tatem küma latettsütsü melen BJP teloki aniba government arur külen Jammu & Kashmir yabo India küboksa süaka temzüng balaka liasüba agien aser state ka agi Union Territory ana kümtsü. Iba sülenbo mapang talangka Jammu & Kashmir nung akhidang ama kiralongra mapa tulu inyakbabo mangashii aruogo. Ajisüaka, tang meimlaika raliwalirtem monga alidak tamangba yimsü asüngdanga orr nisung 26 tashi khaseta yutsüba yimsü amangertemijibo India-i dang masü alima ajungai aitsütsüla. Chiaka koya aser mechiaka koya ta asüba amato, shilem agiaka magiaka Kashmir nung Pakistan nungertemi kiralongraba mapa inyakba nungji Pakistan yimtena shilem lir ta ajaki temulung melemi bilemer. Aji oda, tangari temulung malem bilem tashi Pakistan-sa akoksatsü. Iba ama takoksa tia nungi jenbutettsüa Pakistan-i India den yimjung nung alitsü merangtsüla, kechiyong Pakistan-i India tashi kecha nunga metizüktettsü. Ano, külen India nung yimten yimsüsürtem asoshia tangazükttsü kaji, India nunga tangar tamangba yimsü anemabo tamajung meinyaktsü asoshi tangatetba alitsüla. Aji oda, tangar tamangba yimsü anema inyakdi asünungbo tangaria asenok anema inyaktsü ta India nunger yimten yimsüsürtemi angatetra, iba jagi alima tesem aika nung India nungertem tepela tesünep nung sademsadema alitsü. Aji oda, külen Muslim nungertemi Muslim nunger masüba nisungtem tepsetyonga aoer aser külen Hindu nungertemia Hindu nunger masüba nisungtem anema inyaker ta inyaktepra, alima nung shinga tesünep nung melitettsü. Ano, shidi asünungbo, India ya temetetba aser rongsen nung tashi itta akümba dak alaka India ama Hindu limabo Nepal dak alaka tanga limabo mali, anungji India asoshi tanga tamangba yimsü amangertem den tamangba yimsü mechi meputeptsüba mebilemdangi inyakba shisa maka mapa ka asütsü. Tamangba yimsü yabo koba lima nung südir sang senso shia nem pei mulungba Tsüngrem dak amangtsü temeten agütsütsüla, kechiyong kecha tsüngrem daka mamanger nisunga aika lir, itemjia kodaser kangshia amangdaksütsü ? Aji oda, amangdi süra tamangba yimsü yabo temeim aser yimjung mapa nung amshitsüsa amangtsüla, aji mesüra koba tamangba yimsüi tangar tamangba yimsü anema tashiyim inyaka tsübudaktsür, iba tamangba yimsü tesayubajibo alima kintem longjemer melenshidaktsütsüla.

OLEMSABANG

TAKÜM NUNG KA-ANGKABAJI TASÜBALIR (THE CERTAINTY OF LIFE IS DEATH)

~ P.Renthy Jamir

(Yashi adok nungi...)

Tasüba ya jangratemtsü ta aikati kuli agütsür. Platoi ashir, "Shingaia meshiteter saka tasüba ni nung atema temoatsü tulutiba." Ano Davidia ashi, "Kibuba matsüngdang pa temeshipur asüba senti lir," Linük ochimashi anema noktaker opposition lenir Saro-Wiwa pa soseta südaktsütsü mapang nung yamai ashi, "Kibuba kü nela agizükang, saka teraksa anema rarabajibo maneni aotsü" (Lord take my soul but the struggle will continue) last word before he was hanged. Stonewall Jacksoni tasüba indang yamai ashi, "Asenoki ayongji ajanga odi, aser taküm süngdongzüng akum kübokji süngzükdü." Ano Thomas Edisoni ashi, "Idakji oa onsara tobur tajung limaji lir." Nisung ka asoshi tasüba ya onsara tetsübutü ta bilema John Keats ama mesünür tasütsü tsübur. Saka ano külenbo tasüba jangratemtsü tepelatsü tulu ta ashir jenti lir. Ano tashitak tamajung anebtsü makokba agi kangshir stroke süa paralyse kümer arakzütsü makok cancer mesen agi temang ajak sünger teimla kecha mali tasü yipden nung ayako atener tasütsü yongyar saka anogo agi matong ni südakjang ta asar saka Tsüngremer yongsük anogo mabensara nisungi tepseta südaktsütsü makok. Yamala takum südaktsütsü government kechaia temzüng meyangluteter. Netherland lima iba atema Mercy Killing kum aika atsütepa arur 25-04-2001 nungang shia arua alitsü teimla makar kanga kangshir atema Parliament nung ozüng ka pai ni südakjang ta kuli sütetra doctori mozü zülüja aji agütsütsü lemteta lir. Joko Mercy Killing ozüng ya ayutsü kin kar karibo lemteta aor. Yobia yamai shia lir. Parnoki tasü yongyar saka aji marur. Kechiyong asenok meimchir pei-i sünü agi asütsü masü. Tsüngrem nisung ainkar saka alima shi nung timtem maremtetdang Elijaia "O Kibuba kü taküm bener oang ta ashi." Yonaia "O Kibuba kü taküm kü dak nungi agiang ta ni ne dang mepishir, kechiyong ni asoshi taküm meli-i tasüang tajungba" ta shia angur.

Ano karbo metetsümonga ni ya inyakra, benshira ni shitak tasütsü ta peisasa tasüba bener arur. Nathuram Godse-i Gandhi kasetba, Lee Harvey Oswald-i John Kennedy kasetba, Yigal Amiri Rabin kasetba, Satwant Singhi salem agüja Indira Gandhi kasetba, Tamil tsür Dhanui Rajiv madang apudaka poksetba, tesayur junga liang ta tebang masepba agi Yihudai Kibuba Yisu ashioktsüba. Ano taküm aika peisasa tali mashi talitapong merumerua ambangim dang anojungi Amos-i ashiba ama anjong tenaridang anü ludaktsür. Kodang Napoleon 18-06-1861 anogo Waterloo tongpang nung tamakok angu anü aluba shitak mesüka pa taküm sentong ajak tatem küma laoa dok. Aser pai ashi ajak takoksang Tsüngremji ni asoshi onsara tali liasü (Too much for me). Anungji shisa takarjagi ashir, "Jirena mapa tamajung inyaker tekum mesüra na temeshi tekum, ne mapang matongdang na kechiba asütsü S.7:17. Tanüa Nagaland For Christ atemer yangji ajemdaker kar Tsüngremi nunga asütsüsa lira tasübai asenok memenepdang melenshidi, mapang matongdang kechiba asütsü?

Alima njng meimchir billion paika ya ajak tasütsü aso. Asen India lima nunga nütsüng yongsük 1.21 billionji kabo masütsü aso ta mali süra, Nagaland state nunga nütsüng taremzüür ajak ya toktsür yimsüsür temaba menden nungi nübur anishirtem faction balala nung tokolak tongti lenirtem ajak ya kenü ta pei noktakba wadangji nemdaka yutsür kodanga meshilangtsüba limai aotsü nübur maochi kanga makongdisüa samasajong asürtem ajakji tasübai menepba arudangbo nibo tangbo maruli ta meshitettsü. Aser Julius Caesar kinungtsüi ashiba ama tilar meshimetsür asüdang ita, anü aser petinui temaitsü mesayur. Saka tamarener asüdang anüng nung tamaitsü sayur. Aji oda na asünü anüng nung temaitsü anüja aser anüngsong adoka sayutsü. Süra tasübai ajaba anogo nungji "Lord take my soul, but the struggle will continue" ta ashitsü asü? Mesüra na agi wadangji tatem akumtsü? Mesüra na tasüba anogoji ajurutsü koma renema lir? Kechiaser meimchir ajak asoshi TAKÜM NUNG KA-ANGKABAJI TASÜBALIR.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nagaland Bible College pur 44 buba graduation service agiogo



Mokokchung, Rongchii 24, 2025: Nagaland Bible College, Mokokchung pur 44buba Graduation sentong takok ngua agiba sülen kaketshirtem den tesayur aser college ketdangsürtem külemi tangokba noksa nung angur.

Mokokchung, Rongchii/ April 24 (TYO): Nagaland Bible College, Mokokchung pur 44 buba Graduation sentong April 24, 2025 nü parnok indang Discovery Hall nung meraketa kaogo. Tazüngba telen (degrees & programs) balala nung taküm kaketshir 21-i takok nguogo.

Takok angurtemji; Master of Divinity (M.Div) nung parnok 8, Master of Ministry nung nisung ka, Bachelors of Theology (B.Th) nung kaketshir 4, Bachelors of Ministry nung par 5, Certificate of Intercultural Studies nung parnok 3 liasü. Takok angurtemji - kar tesayur, kar pastor, kar missionary, kar counselor, kar evangelist aser ano tenzükba mapa balala nung inyaktsü tejangrabatem lemsatop.

Kulikaket agütsüba mapaji Nagaland Bible College Principal, Dr. Sentila Ao-i ketdang süa agi. Kaketshir rongnung lenla balala nung tajungtiba takok angur aser sempet tajung alir kar nem award balala agütsü.

Telen balala nungi Academic Excellence Award, Departmental Award, Bible Knowledge Award, Best Character Award, Most Hard-Working Award, Practical Ministry Award, Most Improved Student Award aser Homiletics Award-tem senpettsü. Item senpettemji NBC Academic Dean, Sam Santhosh Kumar ket nungi ammoktsü.

Takoker ajak tenüng nung Mr. Nuho Kumar-i shilem agia liasü.

Pope Francis den asüpila sentong April 26 nü agitsü



Vatican, April 24, 2025: Vatican Secretary of State, Cardinal Pietro Parolin-i Pope Francis tasü mang jakdang sarasademba noksa nung angur.

New Delhi, Rongjui/April 24 (Agencies): Honibarnü (April 26) anepdang 8:00 ako nung Pope Francis den tatembangbuba asüpila sentong agitsü, ta Vatican-i metetdaksü.

Pope Francis Hombarnü asüba sülen Bodhbarnü Vatican-i Pope Francis indang noksa aika sayaogo. Asüpila sentongji Vatican City nung aliba St. Peter's Tenla kidang agitsü.

Pope Francis tasü mang süngdenji Santa Marta kidang chapel nung ayu. Pa Pope küm 12 inyaka arudang pa iba kidang ali. Tasü mang süngden anasaji Swiss nunger Guards nokdaka aliba noksatem-a sayaogo.

Bodhbarnep nungi tenzuka St. Peter's Tenla kidang Pope Francis tasü mang jakdang asür nem akhüm agütsütsü atema public nem temelaba agütsü.

Arrshi küm 88, Pope Francis temelungjang tashidak agi asü. Taküm küm tetenzüklen pa hopta pongu shi hospital nung monga 'double pneumonia' atema treatment agia liasü. Ita ka tejaklen pa Vatican-i meyipa aru aser temang tajungba küma Easter Sunday nunga pai lokti den jembia liasü.

Hombar nikongdang sarasadem sentong lenir Cardinal Mauro Gambetti-i, "Teimla agütsür, Pope Francis-i Arogotem nem sempet balala aika agütsüba atema onoki Kibuba nem tenüngsang agütsür," ta ashi.

Asüpila sentong renemtsü atema Vatican-i Rome nung aliba cardinals ajak jaoka liasü.

Honibarnep asüpila sentong nungji US Tir Donald Trump aser Argentina Tir, Javier Milei na densema linük balala nungi lenirtem aika adentsü.

ANOGO ABEN TSÜNGREM DEN

Tsüngremi anepalur

Kibubai nisung chirtem dak kotak nungi ajizüka yoker. (T.Ken 14:2)

Asenoki idaki kechi inyaker aji kotak nungi Kibubai ajak angur. Tsüngremi asen nüngdak ajak ngua yarir. Iba oren ya kanga tongmelang aser zülutsü temela saka agizüktsü tasak lir. Aika asoshi asenok koba lima nung alir ibai temokong, asadangtsü makok, aser ola maka. Tsüngremji suadok mesüra Pa iba lima nungi sodi agir alir ama aikati bilemer. Mesüra Pa asenok nungi pilar alir ama aikati bilemer.

Tejen mapang Tenüngsang Ken züluri pa tasü aküm lenden nung tanelaren tain (mature) asüba indang zülu: Kibubai nisung chirtem dak kotak nungi ajizüka yoker. Putu ishika suir kulen Yisui iba den atongsema tejangja kuli agutsü: Alu shijak ana poisa ka yong mayoker ama? Aji saka parnok ka danga kotaker Tebui memeteti ali nung metsüker. Alushijak aika dang nungi nenok taoba masü ama? Anungji tetsübu (Matt. 10: 29-31). Tsüngrem tenangzükba nung azüitsü asoshi Pai asenok nem tamang sempet agutsü. Tamang peria makara aseni Tsüngrem tenangzükba nung tamang mekatettsü.

Tanela Temeshi medenibo mission mapa matemtsü: Paulo Feniman



April 24, 2025: Panama nung COMIBAM 2025 Mission Congress tenzükogo, iba sentong tetenzük nung jembidang COMIBAM Tir, Paulo Feniman-i, mission mapa nung Tanela Temeshi ya tiyongtsü südaktsüsüla, ta metetdaksü.

Mongolbar aonung Panama yimtiba, Panama City nung Ibero-American Missionary Congress COMIBAM 2025 tenzuka liasü.

Tenyartem Mapa 1:8 nung ajemdaker Feniman-i, Ibero-American missionary movement-i Tanela Temeshi nung metaloker inyakba ya mamadoktsüla, ta ashi.

"Tashi medeni taküm kuli mali. Mission mapaji inyakyim mesüra experience ajanga renema inyaker masü, saka Tsüngremi asenok nem agütsüba tashi aser taochi agi inyaker," ta pai ashi.

Feniman-isa, küm 38 tejaklen 1987 küm mezüngbuba COMIBAM congress nung Pastor Edison Queiroz-ia kasa Lai tekong nung ajemdaker sayutsüngia liasü, ta ashi.

"Tang-a tajabaji kasa dang lir- Yirusalem, Judea, Samaria aser alima tatem tashi nung Khrista kulisürtem asütsü atema tashi agizüktsüla. Arogo tajaba ya pei nüburtem atema dang masü saka alima kin ajak atema lir," ta pai metetdaksü.

Iba sentong tenzuka tekülem agiba sülen Evangelical Alliance of Panama Tir, Priciano Gil-i lokti pelaa agizükba o jembia liasü.

Pai, "Onoki iba congress sentong lapoktsür. Iba mapang ya Tsüngremer sentong ataloktsü atema Pa leniba meshiba mapang ka südakjang. Missionary aika renemjang, kechiyong alu jenti menzuka lir," ta metetdaksü.

Feniman missionary inyakba sülen taküm küm 25 jungogo.

Feniman-i, "Asenok kiojen, rongsenkettzüng aser sentongtem ajanga asenoki nüma atanger, ajisüaka Tanela Temeshi medenibo temelenshi malitsü, Arogo malitsü mesüra mission malitsü," ta metetdaksü.

COMIBAM 2025 congress nung Latin America nungi mission lenirtem, pastor tem aser tejaokertem meyrirjang aika adentsü aser alima tesem balala nung mission wadang amalitepa inyaksü atema jembitsü.

AO OSHI ANGAZÜKDAK:**TANÜ ANGAZÜKTSÜBA OJANG****Temerük**

(adj) temenen masü, tasüngtet, arü maket (clean)

*Tzü temerük agi süoshi shitoktsüla.

Temesak

(adj) yimya dak alia shi azü mazüoktet japujariba (lewd)

*Temesak nisung dak temoatsü mamonger.



Tir Yimyim

OLONG PAITEP # 7132

1			2			3			4
			5		6		7		
8									
			9						
	10								
								11	12
			13				14		
15						16			

TIPIEN

1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temulungjang
tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemtdak - (6)
12. ___ adenshi - (4)
14. Tsünüsenbongtsü adokdak - (3)

OLONG PAITEP # 7131 TELANGZÜBA**TIPIEN :**

1. Kasa, 6. Rangben, 7. Mait,
9. Poktet, 11. Ati, 13. Atasa, 16. Rür,
17. Rajang, 20. Lanu, 24. Nüngjem,
25. Süra.

LANGTSÜNGLEN :

1. Khu, 2. Süjak, 3. Onük, 4. Oba,
5. Anü, 6. Ratet, 7. Mozü, 8. Ita,
10. Tar, 12. Tinu, 14. Salem,
15. Aja, 18. Anünü, 19. Taju, 21. Ano,
22. Onü, 23. Kua.

NAI-A YA METETTER MA**Alima nung Luxury Watch Brand tajungtiba 10 :**

Rolex
Cartier
Omega
Audemars Piguet
Patek Philippe
Richard Mille
Longines
Vacheron Constantin
Breitling
IWC

Manipur nung police ket nung lanur ka asüba atema longkak aiter*Manipur nung police ket nung lanur ka asüba atema longkak aitba yangi noksa angur.***Imphal, Rongchii/April 24 (Agencies):**

Khoisnam Sanajaoba, custody nung yua aliba mapang asüba anema tentetba Joint Action Committee (JAC)-i Manipur nung Brehostibar ayaterem nungi ghonda 24 state ajunga mokdanga ayutsü ayonzükogo.

Imphal East district nungi arishi küm 27 tain Sanajaoba ya custody nung yua aliba mapang asüba anema iba longkak aitba sentong ya ayongzükogo.

JAC Convener L Kumari Devi, Sanajaoba-i ashiba agi, Sanajaoba ya Imphal East Commando unit-i March 31 nü apu aser pa April 13 nü asü.

Ghonda 24 longkak aitba sentong mayongzükba mapang JAC-i ayongzüka mener longkak aitba, Imphal East

nung rally aser April 17 nü Manipur Angh nem ochi obendang khang tezüla nung takhangba ka agütsüba amala maparen balala benoka inyakogo.

Medical care, water supply, media, electricity aser tamangba yimsü sentong balala iba longkak aitba ajanga mekongshitsü.

JAC-i kecha tebandang makai iba tatalokba ya bushisüngdangtsü akhanger. Parnoki CBI nem ken o agütsütsü mesüra tang tinyakdak mesüra mapa nungi anener aliba High Court judge kati anir judicial inquiry agidaksüner.

Parnokisa sorkar dang Sanajaoba apuba bushisüngdangba aser custody

nung ayuba mapang sendaka aliba ketdangsürtem ajak anema FIR ka benokdaksüner.

Iba den bendenloksema JAC-i ano tanga takhangba ka agütsüogo, kong asür kinunger nem ex gratia tapet agütsütsüba, par kinunger nemsasorkar mapa ka agütsütsüba aser post-mortem report den autopsy indang edit mesüi aliba video lemsateptsüba densema lir.

Kasa mapang nung police-i, Sanajaoba ya March 31 nü apuba KCP-Noyon züngsem pezü rongnung ka liasü, shirnok rakzükrakdemba atema pua liasü, ta ashi.

Ketdangsürtemisa parnoki meita aoba mapang item nisungtem ket nungi prangbong aser injang nguteta liasü, ta metetdaksü.

Pahalgam amakbasülen Meghalaya nung arrtsü nung security akangshir**Shillong, Rongchii/April 24 (Agencies):**

Jammu & Kashmir kübok Pahalgam tesem kiralongrartemi amakbasülen Meghalaya sorkari Bangladesh den arrtsü nung security akangshiogo. Iba lendong nung alima penzür aser iba tesem nung alir nisung 25 tepseta liasü.

Tourism Minister Paul Lyngdoh-i ashiba agi, ketdangsürtemi meita ataba sentong jenjang ajungketshiogo aser tensa asadanga atatsü atema Border Security Force (BSF) den sendaktepa inyakdar. Paisa, arrtsü nung security dak sendakba nung terenloktem Chief Minister Conrad K. Sangma-i achaayangdar, ta ashi.

Lyngdoh-i ashiba agi, pai state indang security setup akangshitsü atema Director General of Police, Idashisha

Nongrang den sensaksemogo. Sorkari telangzüba agütsüba nung shilem ka ama ketdangsürtemi police mapa tazüng 3000 aliba süngdaksütsü atema inyakdar aser security dak sendakba nung tapok alibatam adangtsü atema central agency tem den inyakdar.

Pahalgam amakba ya meimchir inyakim masü ta shia Lyngdoh-i, Union sorkar den külemi kiralongrartem raktoktsü jenjang agiba pusemba metetdaksüogo. Paisa, national security aser regional stability atema Meghalaya bendanga agütsür aliba nenshia metetdaksü.

Kasa mapang nung Jaintia Hills nung Jaintia National Council (JNC) züngsemtemi Bangladesh nungi ozüng alema arrtsü adena arur nisung pongu puogo. Bodhbarnü National Highway-6 nung tesem ka meita aoba mapang iba telok ya pua

liasü.

JNC-i ashiba agi, item nisungtem ket nung kuli kaket tejangja bena maliasü aser parnoki local broker tem teyari agia India-i aitba nangzükogo. Item broker tem yagi parnok anir aotsü atema sen 1000 nungi 2000 tsünga agir.

JNC-i item nisungtem ya Umtyra nung infiltration authorities nem bendanga agütsüogo. Council-isa, ken o ya kanga junga bushisüngdangtsü asoshi takhangba agütsüba den law enforcement dang aibelenalirtem merenshitsü mepeshia metetdaksüogo.

BSF aija JNC-i ashiba agi, parnok ya kecha tetsükdaksü makai international arrtsü adena liasü. Council-isa, iba amala security tamakok ajanga nisung shibelenertem tali temulung uludaksür aser local nisungtem amokmerener, ta ashi.

Tripura: Congress tekolakbai embankment yanglutsü mepeshi**Agartala, Rongchii/April 24 (Agencies):**

Tripura Pradesh Congress tir Asish Kumar Saha-i Brehostibarnü state Chief Secretary dang, tzüngluruwa arur asünung Indo-Bangladesh arrtsü len talisa Kailashahar aser Belonia nung lendong ajurutsü ana nung aliba tesemtem nung embankments takaratiba nung yanglushitsü mepeshia shiti ka zülüogo.

Saha-i shiti nung, India tsütsü arrtsü nung aliba tesemtem tzümetsüng agi kongshitsü ana nung aliba süoki ia bilemba lemsatepogo aser ashiba agi, Bangladesh tsütsülen embankment tem ajungketa yangluogo aser iba ajanga India

tsütsü tzü tali atsünger.

Paisa, tzümetsüng nokdangtsü atema infrastructure tapet maliba ajanga Tripura nung alirtem taküm aser libaliro lendongbang nung toktsür ta ashi.

Saha-isa, Modi lenisüba nung centre sorkar foreign policy aitsüogo aser ashiba agi, foreign policy kanga tashi meiti kümogo aser iba ajanga arrtsü nung alirtem kanga timtemdaksür.

Paisa, loktitemi tetsükdaksü ajangshibatam hau ta mali toktsüba atema centre aser state sorkar naprongla aitsüogo.

Shiti nungsa, Bangladesh-i embankment yangluba ajanga Kailashahar nung India tsütsü alutem raksatsüogo, ta ashi.

Tangbo tzünglu tera dang aru nunga tzü kanga aika atsünger, ta pai ashi.

"Congress MLA Birajit Sinha-i Legislative Assembly nung ken o benokba aser nüburtemi longkak aitba densema ken o kanga süoki ia bilemba lemsatepaka Bangladeshi tsütsü embankment maneni yanglur. Ano embankment project ka Belonia nung tenzükogo," ta pai ashi.

Shah-i ashiba agi, item ken o nung international diplomacy densema lir aser centre sorkari jenjang agitsüla. Paisa, Union Home Minister-i iba ken o ya jangja ali mali ta asüngdanga liasü.

Mulungnen O



Ozü mangyim tejashi mapang yaritepba kija, arogo aser lokti tentet balala dang,

Onoki teti meima aliba ojala aser otsüla **Jenpangwala Jamir** (Ungma), Asür Selemmeren Longkumer kinungtsü, arishi küm 96 nung April 17, 2025 nü iba akumli wadang tembangba sülen ozü atema sarasademtsüba, temeim sayuba aser asükhu lemsatepba asoshi kinunger temi pelaba lemsateper. Nenoki temeim sayuba aser yariba ozü asoshi onsara liasü. Tsüngremi nenok ajak moajangma.

Temeim aser tepela nung, Asür Jenpangwala Jamir kinungertem

OFFICE OF THE PRINCIPAL CLARK MEMORIAL HR.SEC SCHOOL, IMPUR (Estd: 1895) (Affiliated to NBSE)

ADMISSION NOTICE

It is hereby notified for the information of all that, admission to Class 11 (Arts) is going on. Interested candidates may avail the forms from office during office hour (9:00 AM to 3:00 PM)

Subject Offered	Special Features
1. English	1. Qualified, trained & dedicated teachers
2. Ao	2. Hostel facilities available for both Boys & Girls
3. a. Pol. Sc	3. Focus on spiritual and moral education
b. History	4. Provides skill based education
c. Education	5. We strive towards Excellence in all round
d. Economics	development of a child
4. Environmental Education	
Sd/- Chairman Managing Board	Sd/- Principal CMHSS, Impur

Pahalgam amakba sülen Pakistan lenirtem senden ka amen

Islamabad, Rongchii/April 24 (Agencies): Pahalgam nung kiralongrari amakba mechi India-i Pakistan den tesendaktep ajemer anogo ka lir New Delhi nem Islamabad-i telangzüba agütsütsü asoshi telemtetba agitsü atema Ato Kilonser Shehbaz Sharif lenisüba kübok Brehostibarnü National Security Committee (NSC) senden ka menogo.

Sepai kongsang asem tekolak, tongtipang ministers aser civil aser mitkar nungi lenirtem iba senden nung aden, kong linük telungzük aser temalen tensa indang asadanga liasü.

Bodhbar aonung private television channel ka den jembidang deputy prime minister Ishaq Dar-i India telangzüba aitsü aser ibai teintet linük ka ama masü aser kanga kera telemtetba agi ta ashi.

"India-i kuli kecha magütsü. Par telangzüba nung teintet linük ka ama mesayu," ta Dar-i ashi.

Asif-isa, "India-i par mulungba nung Indus Waters Treaty suspend mesütettsü, kechiaser iba tezüngzüktep nungya Pakistan aser India kisüng masü saka World Bank densema danga stakeholders tem lir," ta ashi.

Taoba high commissioner of Pakistan to India, Abdul Basit-ia Indus Water Treaty ya linük kati mulungba kisüng nung suspend mesütettsü mesüra

magientettsü, ta shia liasü.

Pahalgam nung kiralongrari amakba nung arütsü alema tesendaktep aliba metetdakja India-i tongtipang mera pongu agitsü Bodhbarnü sangdong aser yangji Indus Water Treaty anentsü aser Pakistan nunger mitkartem India nungi meindoktsü dena lir.

Mongulbarnü Jammu and Kashmir nung tourist tem timba sür nisung 26 tepsetba nung tayang kepzüker ama Defence Minister Rajnath Singh-i tarutsü nung telangzüba tesashi agütsütsü nangzük.

Cabinet Committee on Security(CCS) senden ka amenba sülen mera balala sangdongba rongnung Attari land-transit post shibangtsüba densema liasü.

Foreign Secretary Vikram Misri ajanga nikongdang osangbener den jembidang, "Union Territory (Jammu and Kashmir) nung takok ngua elections agir rongsenketzüng ainba aser terenlok tsütsü meilongi tejakleni renloka aoba mapang amak," ta ashi.

"Cabinet Committee on Security ajanga iba azüdokshi mapa inyaker nem obendang agütsütsü aser teyarir tem merenshitsü pangjem," ta pai ashi.

Pakistan nung amenoka aliba kiralongrar telok Lashkar-e-Taiba (LeT) den sendaktepa aliba Resistance Front (TRF) ajanga iba azüdokshi tenüng agiogo.

Palestine tiri Hamas dang hostages tem chioktsü akhang

Ramallah, Rongchii/April 24 (Agencies): Bodhbarnü Palestine Tir Mahmud Abbas-i Hamas dang pua alir ajunga chioktsü ajungshi aser parnok ayuba ajanga Israel-i Gaza amaktsü kuli agütsür ta ashi.

Israel-i sapanger aliba territory tesem balala nung amakdang nisung 25 tepset aser Germany, France aser Britain linük temi Israel dang teyari nokdangba tembangtsü ajungshia liasü.

Israel-i Gaza amakba March 18 nü tenzükshia ceasefire ka tembang, aser iba mapang rara anena Palestine nunger tepuodak alir 1,800 melen pua alir nisung 33 chioka liasü.

Ceasefire tasen asoshi jembishinüba nung tang tashi süngiang matanger, aser Hamas delegation ka Egypt aser Qatar mediators den jembishinütsü atema Cairo nung oa lir.

"Mapa tamajung inyaka amokbanger temi Gaza Strip nung par mapa tamajung inyaktsü asoshi Hamas-i kuli agütsüogo aser tejangjabaji hostages tem ayuba ya lir," ta Israel-i amokbanger aliba West Bank kübok Ramallah nungi

Abbas-i ashi.

"Ni iba taa agütsür, asen nüburi iba taa agütsür, Israel-i masü. Adianutem, parnok odang agüjang."

"Anogoshi yangji tasüba lir," ta Abbas-i ashi.

"Azü chirtem, nenoki yua aliba amokjang aser iba mepetmesü nungi asenok anitetang," ta pai Hamas dang o tamajung ashi.

Hamas ketdangsür Bassem Naim-i Abbas o ya mezüngmeshi lir ta ashi.

"Occupation temi mapa tamajung inyakba aser parnoki asen nübur anema tang tashiyim mapa inyakba asoshi Abbas-i temulung malemtsüsa asen nübur tenüng asener," ta pai ashi.

Abbas'er Fatah party aser Hamas tsüngta küm 20 jungnüa yimtenren aser tangatetba nung telemsa tulu adoka arur.

Abbas aser PA yagi mapang shia Palestine nunger telungjem nung Hamas-i timtem agütsür ta aitsür aser Hamas-ia Abbas ya Israel den lungjemer West Bank nung parnok anemer pua merenshir ta aitsür.

Bodhbar aonung Israel Ato Kilonser Benjamin Netanyahu-i Hamas ya "Hitler mesük Nazi nunger" den medemdanga liasü.

"Parnoki Jews nunger ajunga tepseta samatsüner. Parnoki yimjak nung Jewish linük samatsütsü tebilemba sangdong aser yamaji mataloktsü!" ta Israel nung Holocaust Remembrance Day amungdang pai ashi.

Hamas indang armed wing Ezzedine Al-Qassam Brigades ajanga Bodhbarnep video ka sayaba nung Israel nunger pua bener oa Gaza nung takum alirtem sayua liasü.

Israel-i tanen makai Gaza amaker aser Bodhbarnü nisung 25 tepsetba osang tekumzüker temi ashi.

Gaza City kübok Al-Tuffah kiyong nung aliba Yaffa school nung bomb pokloktsüba nung mi tulu adoka nisung tasü mang aika mi agi rongdoker aliba ngutet, ta civil defence odongtar Mahmud Bassal-i ashi.

Israel mitkari iba school nung Hamas kiralongrar tem adenshia aliba aser Islamic Jihad command aser control centre amak ta ashir.

Russia-i Kyiv amak,Zelenskyy South Africa nungi meyipa shilang

Kyiv, Rongchii/April 24 (Agencies): Bodhbar aonung Russia-i missile aser drone amshia Ukraine yimtiba Kyiv amakba sülen Ukraine Tir Volodymyr Zelenskyy tang mezüngbuba South Africa semdanga aliba thir meyipa shilangogo.

Iba lendong nung nisung ti asü aser tanur densema nisung 80 dak tema yiru, ta yangji aliba ketdangsüri ashi.

Linük ana tesendaktep akangshitsü asoshi South Africa Tir Cyril Ramaphosa ajuruba sülen tekeraba nung Ukraine-i meyipa shilangtsü ta Zelenskyy-ia social media X nung ashi.

Yasüng amakba sülen rescue operations tagidak lir aser teraksa tulu liasü ta paisa ashi.

"Ceasefire alitsü aser amakba anena atatsü Ukraine-i mulunger anogo 44 arur," ta pai March ita US aser Ukraine tsüngta khen atema ceasefire nung tezüngzüktep agiba indang athishia ashi.

"Amakba tangsa aser condition kecha makai anentsüla." Zelenskyy-i South Africa semdangba ya Africa nung Russia nunger tsügnep ulua akumba den tokteptsü merangba nung kishi lapokba amai lir.

Küm ana tejakdang Ukraine leniri South Africa semdangtsü ya tamakoktsü liasü, aser iba mapang Tir Ramaphosa-i anir African lenirtemi par sasa peace mission ka atema Kyiv semdang.

Iba mapang Russia-i Ukraine amakba South Africa-i aitsütsü memulungba yong

Kyiv kanga jashia liasü.

Ajisüaka iba sülen linük balala tsüngta tesendaktep kanga melenshi aser tangbo linük anaprong lenmang aisü nung kasa lir.

Linük anaprong ya Washington den mepetmesü tali ajurua arur.

November ita Donald Trump tanaben meshim tashi US ya Ukraine tembang tajungtiba liasü. Tangbo Ukraine-i international partners ulushitsü jangrar - talisa Africa nung, kong Russia den tesendaktep tajung aliba linük aika lir.

South Africa ya Washington den tesendaktep mejungi kumogo, aser US-i par ambassador meindok aser teyari agütsüba ajunga agien.

South Africa-i ashiba agi, parnok 'non-aligned position' nung aliba ajanga Russia den yimjung yanglutsü jenjang tajung ka nung yutsür.

Russia-i Crimea amokbanga yimsü asüba Kyiv-i magizüktsü ta Zelenskyy-i ashiba sülen, Ukraine leniri yimjung ken o jembiba nung tetsükdaksü agütsür, ta US Tir Donald Trump-i Bodhbarnü tai tongloktsü.

Ukraine-i mapang talangka nungi Crimea ya magütsütsü ta shia arur, koba par linük south tsütsü tzü agi meketer lir aser Russia-i 2014 küm ozüng alema rakzük.

Rara tembangtsü asoshi tezüngzüktep ka teyanglur liasü, saka Zelenskyy-i US terms agizüktsü memulungba ajanga kecha mesüteter aser rara atsülanger, ta Trump-i ashi.

Taoba mapang US Vice President JD Vance-i iba

tezüngzüktep atema US mangdang lemsatepa 'tanü aliba anasa territorial lines tem soita ayutsü' ta shia liasü.

Iba tezüngzüktep ya ajanga Ukraine aser Russia linük anaprongi tang kibur kuma aliba alinük kar yutsütsüsa akumtsü ta pai ashi, saka koba tesem nung yamaji inyaktsüar tejangja mashi.

White House nung osangbener temi Trump dang par administration-i Crimea madak Russia kibur kumdaktsütsü lenmang bushir asü ta asüngdang dang, pai rara tatem kati aruba dang aginer ta langzüa liasü.

Russia-i ozüng alema Crimea amokbangba ya par meyong kumdaktsüba ya yimtenren tsütsü Zelenskyy kisüng asoshi agizüktsü tamakoktsü masü saka rara metenzükdang international legal yimya nung arütsü ya tashiyim agi memelenshitsü shia aliba den meputepi akumtsü.

European Union indang foreign policy tekolak Kaja Kallas-i ashiba agi, Moscow-i Ukraine nung amakba ya yimjung bushir masü yimjung bushiba nung atalaba lir.

"Asangsang nung tetsükdaksü ya Ukraine masü Russia lir, shir indang rara nükjidong memelenshi," ta lai X nung ashi.

Ireland Ato Kilonser Micheal Martin, Denmark Defence Minister Ruben Brekelmans aser Estonia Foreign Minister Margus Tsahkna nungeria Russia-i Bodhbar aonung Ukraine amakba aitsüogo.

Season tembangba sülen Vardy-i Leicester toktsütsü



Rongchii/April 24, 2025 (Agencies): Leicester City captain Jamie Vardy-i season tembangba sülen club toktsütsü.

Iba osang sangdongba mapang Leicester-i Vardy ya asayar tajungtiba rongnung ka ta ashi.

Arishi kum 38 tain striker, shiba 2012 kum non-league side Fleetwood Town nungi club nung dena liasü, pa ya Premier League nung club nungi goal timtiba idaktsüba asayar lir. Pai PL nung goal 143 idaktsü aser tetoktepba ajak nung club tenüng nungi 498 ben asayaba mapang goal 198 idaktsüogo.

2015-16 Premier League nung varyd-i goal 24 idakja par team-i puti otsü nung

mezüngbuba Premier League akokba nung teyari tulu agüja liasü.

Taoba mapang England international asayar ya 2021 FA Cup akokba team nunga dena liasü. Wembley nung final asaya nung parnoki Chelsea pur goal 1-0 agi koka liasü.

"Leicester fan tem dang, iba anogo tonga aruba atema ni kanga mepelar, saka iba anogo ya arutsü ta ni meteta liasü," ta Vardy-i video ka nung ashi, koba Leicester puri social media nung lemsatepa liasü.

"Ni iba club nungi kum 13 jangradema asayaogo aser takok aika anguba den tamakoka nguogo, saka timba takok dang liasü.

"Joko anentsü mapang tongogo aser iba atema ni kanga mepelar, saka tang ya mapang shitak ta bilemer.

"Leicester ya kü mulung nung teti alitsü," ta pai ashi.

Kasa mapang nung Leicester Chairman, Aiyawatt Srivaddhanaprabha-i, "Jamie ya tangar dang nungi balaka. Pa ya asayar tongtibang ka aser iba dang nungjagi tali pa ta tongtibang nisung ka lir.

"Leicester City den sendaka alir mulung ajak nung pa lir aser ni pa akümtsübur aser asener," ta ashi.

2016 kum PL akokba team nungi King Power Stadium nung tang tashi asayatem rongnung Vardy ya tatembangbuba asayar lir.

2023 kum Leicester pur relegate asüba sülena pai club metoktsü aser 2024 kum parnok Premier League-i meyipa aruba nung pai teyari agüja liasü.

Vardy-i tang asaya aliba season nunga asaya 30 nung goal tenet idaktsür lir.

Leicester pur iba it tetenzüklen relegate asüba sülen pai club atema tang asaya aliba season ya kanga majung aser maksü tulu liasü ta ashi.

Ruud van Nistelrooy-i aniba team yagi asaya 33 nungi point 18 ngua table nung tang 19buba nung lir.

Mizoram nung mezüngbuba International Half Marathon asayatsü

Rongchii/April 24, 2025 (Agencies): Aizawl International Half Marathon (AIHM) April 26 nü asayatsü atema renema lir aser iba asaya asoshi asayar 500 shi züngoksemogo, ta Mizoram Sports and Youth Services department-i metetdaksü.

AIHM ya state nung iba amala asayamung mezüngbuba lir, koba Mizoram sorkar aser Innovations India nati health, fitness aser tourism ajungkettsü aser temesepba mozü anema campaign ka ama ayongzüko.

Iba asayamung nung shilem agitsü atema züngoksemtüsü asoshi anogo ka dang anunga lia Bodhbarnü nikongtsütsü tashi nung asayar 500 jungnüa züngoksemer liasü, ta ketdangsürtemi ashi.

Local asemtepertem dak alia India nung state 10 nungi aser bendanglen nungi Kenya aser Vietnam amala linüktem nungi asayatem iba international asayamung nung shilem agitsü atema züngoksemogo, ta parnoki ashi. Online aser offline registration Brehostibarnü

nikongtsütsü 6 ako nung shibangogo.

Kasa mapang nung state sports minister Lalnghinglova Hmar-i iba marathon sentong atema official T-shirt sayaogo.

Sentong nung o jembiba mapang pai ashiba agi, iba asaya ya fitness aser tourism ajungkettsü nükdong nung ayongzüko.


Iba asayamung ayongzüka nükdongji Mizoram ya international Marathon map-i idaktsütsü asoshi lir.

Hmar-i, linük kübok tesem balala aser bendanglen nungi asemteper Mizoram-i arua iba sentong nung shilem agitsü pelashishia jaokogo.

Hmar-i ashiba agi Marathon asemtepa nung category pezü alitsü. 21.1 km (half marathon), 10 km (open race), 5 km (fun race), aser junior tematema 5 km asemtepa. Takoker nem senpet sen lakh 10 agütsütsü.

Hmar-isa, taruba kum aser tarutsü nung Marathon asemtepa sentong tali ayongzüka agitsü sorkar sentong lir, ta ashi.

Alcaraz yiruba ajanga Madrid Open nungi tuguogo



Rongchii/April 25, 2025 (Agencies): Carlos Alcaraz yiruba sülen Madrid Open nung masayatsü atema telemteba agiogo, ajisüaka pa French Open nungbo pa indang title defend asütsü imla atadar.

Spain nunger world number three asayar ya Deobarnü Barcelona Open final nung tanabuba set asayaba mapang hamstring aser groin yirua liasü.

"Hopta ka ana lir ni training agi tenzüksü, saka ni jenjang ka nung jenjang ka dang agitsü," ta Alcaraz-i ashi.

"Ni hopta tepeyong practice mesütet. Ni kü temang asadanga telemteba shitak agitsü nungdaka liasü.

"Jelia kecha jembia

mataner, saka ni French Open atemabo renemer alitsü amanger," ta pai ashi.

Alcaraz, shibai Madrid Open anaben koker lir, pai April ita Monte Carlo Masters kokogo.

Barcelona nung Holger Rune den final asayaba mapang pa temang anepalutsü atema court toktsür ao aser iba sülen pa tanaben arua asaya saka Denmark nunger asayar yagi iba asaya 7-6 (8-6) 6-2 agi koka liasü.

Alcaraz-isa, pa Rome-i oa Italian Open asayatsü tebilemba lir, koba May 25 nü asadanga telemteba shitak agitsü nungdaka liasü. tsüngda May 6 nü nungi tenzüka asayatsü.

World Athletic atema Gout Australia team nung züngokemogo



Rongchii/April 24, 2025 (Agencies): Lanur asemteper Gout Gout, September ita Tokyo nung asayatsü aliba World Athletics Championships atema Australia indang team nung züngoksemogo.

Arishi kum 17 tain asemteper ya South Sudan nungi Australia-i arur ka jabaso lir aser pa 200 metres nung asemtepsü. Iba ita Perth nung 200 metres asemtepa 19.84 seconds nung tongteta mezüngbuba national title abenba sülen pa team nung züngoksemogo.

Gout-i 19.84 seconds nung alizüng tongtetba ya arishi kum

20 tekübok aliba asayatem rongnungi 200 meter takaratiba asemzüka tanabuba liasü.

Queensland nungi asayar ya kanga kara renloka odar aser pa ya Jamaica nunger asemteper Usain Bolt den medemdanger aser 2032 kum Brisbane nung Olympics ayongzüka masaya tsüngda pa Australian track and field indang poster boy kumtsüogo.

"Tokyo World Championships nung 200 nung asemtepsü atema ni shimba atema kanga pelar," ta Gout-i ashiba Australian Athletics-i Bodhbarnü sangdong ka ajanga

metetdaksü.

"Onok nükdong aji liasü. September ita asayatsü yongyaseta atar aser alima nung tajungtiba den ni koma asayatetsü aji repranga atati," ta paisha shisem.

Australia team nung ano lanur asayatem aika lir, kong arishi kum 18 tain Cameron Myers densema lir shibai Perth nung 1,500 national title benogo. Paisha, February ita New York nung Millrose Games asayaba mapang under-20 athletes (3:47.48) tem rongnung takaratiba asema liasü.

Taoba mapang high jump world champion Eleanor Patterson, shiba Paris Olympics nung bronze medal ngua liasü, la-a Bodhbarnü sangdongba team nung züngoksema liasü.

March ita Nanjing nung Nicola Olyslagers sülen silver anguba sülen, la asayamung tongtibang ka nung medal trokbuba angutsü atema meranga asayatsü.

Peter Bol, shiba Tokyo Olympics nung 800m asemtepa nung pezübuba nung tembanga liasü, pai Perth championships nung national record (1:43.79) yangluba sülen form kanga junga lia Tokyo nung oa asayatsü.

BILEMDANGANG

"Tamang majangi tesangwa koda jangjatsü."